



Ûn proget musical-architectonic tanter duos regiuns

NICOLÒ BASS

Il proget «Haus» voul unir musica ed architectura in duos regiuns differentas. Ils iniziants sun cuntaints cun l'andamaint da las trais cumposiziuns.

Immez ün local a Nairs sezza üna persuna cun serrà ils ögls. Tuot in tuorn capita canera e musica e la persuna reagischa sün mincha cling dalöntschi e dastrusch chi vain eir influenzà dal local. Per üna jada nu sta il musicant e chantadur i'l center, dimpersè l'auditor. Quai es l'idea da l'arrandschamaint «Lit Marveil», chi ha gnü lö quists dis in differentes lös tanter Klosters, Scuol e Sent: Üna performance 1:1 ingio cha adüna üna chantadura o ün chantadur chanta per ün giast. «Lit Marveil» es

üna da trais cumposiziuns dal proget musical-architectonic «HAUS», chi vain organisà da Beat Gysin in collavuraziun cun l'Atelier Bolt a Klosters, la Fundaziun Nairs a Scuol e la Grotta da cultura a Sent. Ils differentes arrandschamaints han gnü lö dals 26 favrer fin als 3 marz. Cumanzà han ils dis da cultura in sonda a Klosters, ils prüms arrandschamaints in Engiadina Bassa han gnü lö ils prüms marz a Sent e Scuol.


Trais cumposiziuns differentas

Il böt da l'iniziant Beat Gysin, chi viva e lavura a Basilea, es dad unir musica ed architectura, in duos regiuns differentes sco il Partens e l'Engiadina Bassa chi sun colliadas cul tunnel dal Vereina. Cun seis arrandschamaints, per exaimpel a Nairs, ha el uni eir indigens e giasts cun artists chi vivan e lavuran a Nairs. Sper la cumposiziun «Lit Marveil» han gnö lö eir musica da chasa «Hausmusik»

e musica d'architectura «Architektur- und Musik», cumbinà cun spassegiadas, lavuratori e discuors. L'organisatur Gysin es cuntaint cun l'andamaint: «Ils arrandschamaints sun stats bain occupats.» Cha impustüt la guida tras Sent al di da Chalandamarz, tadlond las differentas caneras in ed intuorn il cumün, saja statta speciala, quinta'l. «Nus vain gnü fich buns rebombs dals partecipants e tuots han gnü plaschair da quists arrandschamaints specials.»

In marcurdi davomezdi ha gnü lö amo üna spassegiada cun gianellas «dastrusch e lontan» cun partenza a Sent. La finischiun da la prüm'ediziun dals Dis da cultura «Haus» cun üna buna dunzaina d'occurrentas, ha lö in gövgia cun ün'ediziun da «Lit Marveil» in collavuraziun culla scuola primara da Sent.

www.studio-klangraum.ch



L'auditor es per üna jada l'i center da la performance 1:1 «Lit Marvel» chi ha gnü lö tanter oter elr a Nairs.

fotografia: mad